

VENDIM
Nr. 110, datë 3.4.2013

MBI VLEFSHMËRINË E LICENCËS SË SUBJEKTIT TELEVIZIV KABLLOR
“TV ME KABËLL KAMZA”

Këshilli Kombëtar i Radios dhe Televizionit, i përbërë nga:

Endirë Bushati	kryetare
Sami Nezaj	zëvendëskryetar
Suela Musta	anëtare
Gent Ibrahim	anëtar
Zylyftar Bregu	anëtar

pasi mori në shqyrtim çështjen me:

OBJEKT: Mbi vlefshmërinë e licencës së subjektit televiziv privat kabllor “TV me kabëll Kamza”.

BAZA LIGJORE: Neni 7 pika 21, neni 33 pika 5 të ligjit nr. 8410, datë 30.9.1998 “Për radion dhe televizionin publik e privat në Republikën e Shqipërisë”, të ndryshuar, Këshilli Kombëtar i Radios dhe Televizionit,

VËREN SE:

KKRT-ja, me vendimin nr. 640, datë 12.11.2007, ka vendosur të licencojë subjektin, person fizik Ledio Shameti, për subjektin televiziv privat kabllor “TV me kabllor Kamza”, për të mbuluar me sinjal televiziv bashkinë Kamëz. Afati i licencës së subjektit përfundon në datën 10.12.2013.

KKRT-ja konstaton se subjekti televiziv kabllor “TV me kabllor Kamza” nuk ka shlyer detyrimet financiare, pagesë vjetore për licencë, pavarësisht njoftimeve të herëpashershme nga KKRT-ja.

Kështu, KKRT-ja me shkresat nr. 630 prot., datë 9.6.2009, nr. 269 prot., datë 15.2.2010, nr. 728 prot., datë 22.6.2010, nr. 653 prot., datë 5.4.2011, nr. 668 prot., datë 7.4.2011 dhe nr. 196/38 prot., datë 2.2.2012, ka njoftuar zyrtarisht subjektin televiziv kabllor “TV me kabllor Kamza”, por pavarësisht këtyre njoftimeve, subjekti vazhdon të jetë debitor ndaj KKRT-së në masën 1.920.830 lekë.

Më tej, me shkresat nr. 759 prot., datë 5.6.2012 dhe nr. 1053 prot., datë 13.7.2012, i është ripërsëritur kërkesa për kryerjen e pagesave, duke u paralajmëruar se në rast të mosshlyerjes së detyrimeve, nga ana e KKRT-së, do të ndiqen procedurat për bërjen të pavlefshme të licencës së subjektit.

Me vendimin nr. 24, datë 18.1.2013, KKRT-ja ka njoftuar subjektin televiziv privat kabllor “TV me kabllor Kamza” për fillimin e procedurave për bërjen të pavlefshme të licencës së subjektit. Pavarësisht se është njoftuar edhe për vendimin e mësipërm, subjekti vazhdon të jetë debitor ndaj KKRT-së.

Neni 33 i ligjit nr. 8410, datë 30.9.1998 “Për radion dhe televizionin publik e privat në Republikën e Shqipërisë”, të ndryshuar, parashikon se:

“Licenca bëhet e pavlefshme kur:

...

5. kërkuesi nuk realizon detyrimet financiare të parashikuara me ligj pas 90 ditëve nga momenti kur merr dijeni zyrtarisht për miratimin e saj”.

PËR KËTO ARSYE,

Këshilli Kombëtar i Radios dhe Televizionit, në mbështetje të nenit 7 pika 21, nenit 33 pika 5 të ligjit nr. 8410, datë 30.9.1998 “Për radion dhe televizionin publik e privat në Republikën e Shqipërisë”, të ndryshuar,

VENDOSI:

1. Të bëjë të pavlefshme licencën nr. 050/RTV kabllor të subjektit televiziv privat kabllor “TV me kablllo Kamza”.

2. Subjekti sipas pikës 1 të ndërpresë menjëherë transmetimin.

3. Ngarkohet administrata e KKRT-së për zbatimin e këtij vendimi.

4. Kundër këtij vendimi mund të bëhet ankim në gjykatë brenda 30 ditësh nga marrja dijeni, në përputhje me Kodin e Procedurës Civile, kreu “Gjykimi i mosmarrëveshjeve administrative”.

Ky vendim hyn në fuqi pas botimit në Fletoren Zyrtare

KRYETARE
Endirë Bushati